

PM garis lima keutamaan 2021

PUTRAJAYA: Kerajaan menggariskan lima keutamaan pada tahun 2021 dalam satu strategi bersepadu pemulihan negara pasca Covid-19.

Perdana Menteri, Tan Sri Muhyiddin Yassin berkata, lima keutamaan itu ialah pertama mempertingkatkan tahap kesihatan awam melalui perolehan bekalan vaksin Covid-19 serta melancarkan program vaksinasi di seluruh negara dan kedua memperkukuh ekonomi prihatin rakyat dengan memacu pertumbuhan ekonomi negara pasca Covid-19 melalui pelaksanaan Belanjawan 2021 dan Rancangan Malaysia Ke-12 (RMK-12).

Menurut Perdana Menteri, keutamaan ketiga pula ialah memastikan kestabilan politik dan kerajaan termasuk tadbir urus yang baik sebagai asas kepada pemulihan ekonomi yang mampan dan keutamaan keempat ialah menjamin kedaulatan negara terpelihara dan kedudukan Malaysia di persada antarabangsa diperhebat.

Jelas Perdana Menteri,



MUHYIDDIN YASSIN

keutamaan kelima ialah memperkukuhkan hubungan antara kaum dan agama dalam membentuk masyarakat yang bersatu padu menentang sebarang ancaman.

“Tahun 2020 merupakan tahun yang amat sukar dan mencahar, namun, saya percaya sebagai insan dan rakyat bumi

bertuah Malaysia ini, masih banyak nikmat yang boleh kita syukuri. Justeru, marilah kita sama-sama mengembleng kekuatan dan kecekalan yang ditunjukkan sepanjang tahun 2020 untuk melangkah ke tahun baharu 2021 dengan semangat yang lebih kental.

“Matlamat kita adalah untuk melihat Malaysia yang lebih bersatu-padu, bebas dari ancaman Covid-19, rakyatnya yang makmur dan sejahtera, ekonominya pulih dan rancak berkembang serta namanya yang megah di persada antarabangsa.

“Kerajaan Perikatan Nasional (PN) akan terus memartabatkan syiar Islam dengan memenuhi tuntutan Maqasid Syariah yang menjaga agama, nyawa, akal, keturunan dan harta tanpa menafikan hak agama lain dalam keadaan negara sedang berhadapan pandemik,” katanya dalam perutusan khas sempena sambutan tahun baharu 2021 bertemakan ‘Bersemangat Melangkah ke Tahun Baharu 2021’, di sini malam ini.

Menurut Perdana Menteri, kerajaan Malaysia akan memastikan bekalan vaksin yang berkesan, selamat dan mencukupi untuk sekurang-kurangnya 80 peratus rakyat di negara ini secara percuma melalui Pelan Imunisasi Covid-19 Kebangsaan yang akan dilaksanakan Kementerian Kesihatan melalui 3 fasa bermula seawal Februari 2021.

Menyentuh keutamaan kedua, kata Perdana Menteri, belanjawan terbesar dalam sejarah negara amat kritikal bagi memastikan ekonomi negara dapat dipulihkan dan kesejahteraan rakyat sentiasa terpelihara.

Kata beliau, kerajaan akan terus membangunkan jaringan keselamatan sosial seperti bantuan tunai secara langsung seperti Bantuan Prihatin Rakyat, skim perlindungan insurans khusus untuk B40 dan memperkukuh sistem kebajikan negara untuk memastikan nasib golongan rentan termasuk B40, warga emas dan Orang Kurang Upaya sentiasa terbelas.